

'Tugu hidup' sembah bumi akibat hakisan

Sinar 12/1/2018
No 39

MARANG - Terengganu yang mempunyai pesisir pantai yang panjang sehingga digelar negeri pesisir pantai atau negeri pesisir air menyebabkan banyak kawasan terdedah kepada hakisan termasuk di daerah ini.

Situasi tersebut dilaporkan kian meruncing sehingga menyebabkan penduduk berhampiran tidak dapat tidur lena terutama ketika musim tengkujuh, ombak kuat dan air pasang.

Di Kampung Rhu Dua misalnya, keadaan semakin teruk akibat hakisan menyebabkan pokok-pokok bercabang dua didakwa penduduk sebagai 'tugu hidup' sempena nama kampung itu tumbang.

Walaupun Jabatan Pengairan dan Saliran (JPS) negeri ada membina tambak batu bagi menghalang hakisan merebak di beberapa kawasan berhampiran, namun hakisan masih tetap berlaku.

Perkembangan itu turut mendapat perhatian Pemuda Pas Kawasan Marang yang bimbang keadaan semakin meruncing sekiranya tiada penyelesaian terbaik



Keadaan hakisan pantai yang kian meruncing.

diambil.

Ketua Pemuda Pas Marang, Yusof Abdul Hadi berkata, pihak berkaitan perlu mencari segera penyelesaian terbaik bagi menangani masalah hakisan pantai di beberapa kawasan terlibat.

"Harapannya supaya kerajaan di bawah JPS dapat menangani segera masalah hakisan di Marang, terutama kawasan yang teruk terhakis bermula di pelabuhan Marang hingga Cendering termasuk di Pantai Kijing, Rhu Rendang, Rhu Dua,

Rusila dan Rhu Renggeh.

"Kita mohon kerajaan di bawah JPS membuat benteng yang kukuh untuk menghalang hakisan ombak," katanya.

Yusof berkata, masalah ini bukan baharu, tetapi sehingga kini belum ada penyelesaian jangka panjang diambil sehingga menyebabkan hakisan pantai terus berlaku.

Susulan itu, beliau berharap pihak berkaitan dapat mencari penyelesaian terbaik secepat mungkin

kerana pantai di situ telah hanyut ditelan ombak.

Sementara itu, pengusaha hasil makanan laut di Rhu Muda mendakwa turut berdepan ancaman hakisan pantai akibat angin kencang, hujan lebat dan ombak besar yang mula berlaku.

Mereka mendakwa, pengusaha mungkin berdepan kerugian jika air pasang besar berlaku yang menghakis dan merobohkan tempat memproses hasil makanan laut diwarisi daripada keluarga.